

ABBREGE

Du

SERMON FUNEBRE

Sur la mort du

TRES-HONORABLE

PHILIPPE

Comte de *Pembroke & Montgomery*,

advenue le 23 de Janvier

l'an 1650.

Prononcé en la Chapelle de

l'Hostel de Durham, le 27

du mesme mois,

Par JEAN DESPAGNE, Ministre

du S. Evangile.

Imprimé à LONDRES, par
Tho. Newcomb, 1650.

39
47

A. B. K. J. N. G. E.

THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N. Y.

1897

1897

1897

1897

1897

1897

1897

1897

1897

1897



Au Tres-honorable

P H I L I P P E



Comte de *Pembroke & Montgomery*, Baron de *Sburland*, Seigneur de *Caerdiffe, Parr, Ros & Kendal, Marmyon & S. Quintin.*

MONSEIGNEUR,



*E pensoye vous
presenter une
autre piece que
celle-ci. Mais
la triste occur-
rence en laquelle
Dieu a visité
vostre tres-illustre Maison, nous a
fait quitter nos harpes, pour faire*

9
7
place aux regrets & aux soupirs.
Et mesme, je ne vous exhibe qu'un
abbregé des consolations que nous
avons prinſes contre une douleur ſi
cuiſante. Car auſſi, Monſeigneur,
pour enclorre toute l'eſtendue des
penſées que nous avons eues ſur un
ſi notable ſujet, de la gratitude que
nous devons à la memoire d'un tel
Bienfaiteur, de l'eſpoir qui nous
reſte en vos vertus & en ceſt ex-
cellent naturel que Dieu a mis en
vous, & finalement, des ſouhails
que nous faisons pour voſtre con-
ſervation & proſperité, un volume
entier ſeroit tousjours trop petit.
Mais, Monſeigneur, nos reſſenti-
ments, leſquels nous vous ſupplions
d'avoir pour agreables, ſurpaſſeront
tousjours nos paroles.



HEBR. chap. 11. au verset 4.

Estant mort , il parle encore par icelle.



J'ay laissé, pour ceste fois, en surseance nos exercices ordinaires , pour donner ceste action à la mémoire de nostre Bienfaiteur, qui nous a recueillis ici, & que Dieu a re-

(2)

cueilli en sa gloire. Ce que nous devons dire sur ce sujet, découle si ouvertement de ce texte, que nous ne pouvions en trouver un plus formel.

Voici un grand paradoxe, Qu'un homme parle apres sa mort. Abel survivant à soy mesme, fait encore retentir sa voix du fond du sepulchre. La mesme Foy qui l'animoit vivant, le fait encore parler apres son decez ; voire fait passer ses paroles au travers de tous les siecles.

Cinq estranges merveilles ont monstté le pouvoir de celuy qui tient les clefs de la mort. Car il s'est signalé

1. En l'ayant prevenue & empeschée. Comme en Enoch, qui fut transporté sans voir la mort.
2. En tournant en gloire l'approbre qu'elle verse sur l'homme. Comme en Moyse, qui eut l'honneur d'estre enteveli des propres mains de Dieu.
3. En luy arrachant ses conquestes. Comme en plusieurs qui ont esté ressuscitez d'entre les morts.

(3)

4. En l'employant contr'elle mesme.

Comme quand un mort ressuscita par l'attouchement d'un autre mort, qui estoit Elisee.

5. Et finalement, en faisant qu'un mort se soit ressuscité soy-mesme, & en ait ressuscité plusieurs autres avec soy. Ce miracle n'appartenoit qu'à Christ, & n'a esté fait que par luy.

Entre les suites d'aucunes de ces merveilles, nous oyons parler les morts. Toutesfois la Sainte Histoire n'en mentionne que trois qui ayent parlé apres leur decez; asçavoir, Moyse, Elie, & Jesus Christ. Les trois qui sont remarquez par leur jûne miraculeux de 40 jours; les trois qui apparurent en gloire, & se trouverent ensemble en la Transfiguration. En ceste fameuse rencontre, Elie & Moyse, long temps apres leur decez, parlerent de l'issue de Christ, laquelle il devoit accomplir en Jerusalem. Et Christ ayant accompli ceste issue, & revenu d'entre les morts, se monstra

(4)

par l'espace de 40 jours, parlant & enseignant ce qui est du regne de Dieu. L
Et depuis encore, il a parlé du haut gr
du ciel ; comme à Saul, sur le chemin ho
de Damas, *Act. 9.* qu

Mais il y a d'autres morts que l'E- la
criture represente parlants, quoy pa
qu'en différentes sortes. Leur Sang, en
leurs Ames, leur Foy, parlent encore en
apres la mort ; és cieux, en la terre, és en
enfens. Ainsi le sang d'Abel crioit de Ra
la terre au ciel. Ainsi le sang de Christ m
parle encore, & prononce meilleures pa
choses que le sang d'Abel. Ainsi les pa
ames des Martyrs crient de dessous de
l'Autel qui est au ciel, *Apo. 6.* Ainsi co
le mauvais riche parle du fond des en- or
fers, & Abraham luy respond de loing. est
Ainsi la Foy d'Abel parle encore l'e
maintenant. en

Ce langage, direz-vous, n'est qu'une pre
forme de representation. Mais ne pen- ce
sez pas que ce soit une simple figure as
de Rhetorique, comme celle des Ora- leu
teurs qui attribuent un langage aux mi
creatures inanimées, & s'efforcent de
faire

en faire parler les ombres des morts.
 Le style de Dieu a de plus
 grandes dimensions que celuy de
 hommes, & ses caracteres ne sont
 que realitez. Quand Dieu qui donne
 la vie aux morts, introduit les morts
 parlants, c'est pour dire qu'ils vivent
 encore apres leur mort. Car, mesme
 en nommant ceux qui ne sont point
 es encore, desja il leur donne existence.
Rom. 4. 17.

Abel qui parle encore, est le pre-
 mier qui mourut jamais. C'est une
 particularité notable, que le premier
 des morts est représenté parlant. En
 toute matiere que l'Escripture fournit,
 ordinairement le premier exemple
 est comme la regle des suivans, &
 l'eschantillon de toute la piece. Ainsi
 en la personne de celuy qui a esté les
 premices de la mort, Dieu a monsté
 ce qu'il faut dire de tous les morts,
 a sçavoir, qu'ils vivent encore apres
 leur trespas.

Mais que les morts parlent, le Psal-
 miste semble le nier, & avec luy Eze-

chias en son Cantique. Car ils disent que le sepulchre ne louëra point Dieu. Ils luy demandent, comme chose esloignée de toute apparence, *Feras-tu miracle envers les morts ? les trespassez si releveront-ils pour te celebrer ? la poudre se loiüra-elle ?* Ps. 6. & 30. & 88. Esa. 38.

Certes, il n'ont pas ignoré que Dieu pouvoit faire parler les morts. Pourquoy donc tiennent-ils ce langage ? On pourroit dire quant à David, que jusques alors nul mort n'avoit encore esté ressusité. Car ceste merveille n'a commencé de paroistre qu'ès jours d'Elie, en la personne de l'enfant de Sarepta, plus de cent ans apres le trespas de David. D'autant donc qu'il n'y avoit encore nul exemple d'aucun mort qui fust retourné en vie, le Psalmiste ne sçavoit pas si (excepté la resurrection de Christ, & celle du dernier Jour, de laquelle il ne doutoit point) Dieu feroit encore ceste espece de miracle, avant la fin du monde.

(7)

Mais on ne peut pas dire le mesme sur les paroles d'Ezechias. Car avant son temps, trois morts avoyent esté ressuscitez, & mesme l'un d'eux estoit sorti du sepulchre, (2 Roix 13. 21.) Il semble donc que ces termes contiennent quelque chose de plus mysterieux. Toutes les Resurrections qui estoient advenues, n'estoyent que particulieres, & nul ne pouvoit en tirer consequence pour la siene propre. Car on n'avoit pas encore le gage expres & formel de la Resurrection glorieuse de tous le justes, asçavoir, celle de Christ; laquelle n'est survenue que long temps apres, & depuis a esté proposée comme le fondement de la nostre, Christ ayant esté fait les premices des dormants, 1 Cor. 15. Aussi, depuis que Christ est revenu d'entre les morts, & a parlé aux hommes, il n'a plus esté loisible de demander si Dieu fera parler les morts.

Un autre point touchant Abel. Nous pouvons dire en quelque es-

gard, qu'estant vivant il n'a jamais parlé. Vous sçavez qu'en l'Ecriture ce qui ne paroît point, est en quelque sorte tenu comme n'estant point. Or nous ne liions aucune parole qu'Abel ait prononcée tandis qu'il vivoit. La Sainte Histoire le tient dans le silence tandis qu'il est vivant, & le fait parler apres sa mort. Voici un ordre tout contraire à celui de la Nature. La mort, qui rend muets tous les hommes, a rendu Abel eloquent. En l'estat auquel tous les hommes cessent de parler, Abel a commencé de parler. Celuy qui n'avoit point parlé en sa vie, crie & parle apres son decez.

Il faut neantmoins entendre, comme il est ici presupposé, qu'estant vivant, sa Foy parloit pour luy. J'ay creu, pourtant ay-je parlé, *Pf. 116. 10.* L'on peut demander, Dequoy parloit la Foy d'Abel ? Et puis qu'elle est ici opposée à l'incroyance de Cain, que pouvoit croire Abel plus que Cain ? Cain ne croyoit-il pas, aussi bien qu'Abel, qu'il y avoit un Dieu

Souverain lequel venoit de bastir cest univers ? La creation du monde estoit toute recente : la terre n'avoit encore aucuns habitants provenus d'homme & de femme, que ces deux freres : leurs pere & mere avoyent veu le genere humain commencer en leurs personnes ; & sçavoyent leur reciter le mariage que Dieu avoit fait entr'eux, leur introduction dans le paradis terrestre, l'arbre de vie & celui de science, l'imposture du Serpent, leur credulité, le jugement que Dieu prononça contr'eux, & finalement, la promesse touchant celui qui devoit briser la teste de cest adversaire. Disons-nous que Cain ayant des tesmoins si oculaires, si recevables, si constants & si conformes, & luy-mesme voyant encore de ses propres yeux les traces & suites de tant de veritez, ne leur ait point adjousté foy ? est-il croyable qu'il les ait tenues pour incroyables ? En quoy donc manquoit-il de Foy ?

Quelques uns estiment qu'encore

qu'il ait creu tous ces poincts historiques qui marquoyent le passé, dont il avoit tant d'evidences, neantmoins il n'a point creu ce qui estoit encore à venir, asçavoir, qu'il y eust un autre siecle apres cestui-ci, un Jugement, & une autre vie. Mais, pour dire seulement ce qui a plus d'apparence, il semble, veu l'antithese ordinaire que l'Apostre fait entre la Foy & les œuvres, dans l'acte de la Justification, que Cain a esté le premier de ceux qui ont voulu se Justifier par les œuvres. Il a manqué de Foy, en ce qu'il a voulu estre Justifié autrement que par Foy. Mais Abel parloit tout au contraire, soustenant que la seule Foy rend & l'homme & ses œuvres agréables à Dieu. Ainsi parloit la Foy d'Abel.

Mais que ceste Foy parle encore apres sa mort, c'est une assertion qui semble incompatible avec une maxime de l'Apostre mesme, Que ni la Foy ni l'Esperance n'ont plus de lieu dans le ciel; & que c'est la preemi-

nence de la Charité, de n'estre jamais supprimée. La Foy cesse apres la mort, & passe en Vision claire & presente ; comme les flambeaux de la nuit font place à la venue du Soleil. Comment donc ceste Foy parle-elle encore, veu qu'elle n'est plus ?

La responce ordinaire ne me satisfait pas , aſçavoir, Que la Foy d'Abel est encore vivante en l'Histoire, & en la memoire des hommes. Le Juifs disent que le Gouvernement de Samson, qui fut un des Juges d'Israel, dura l'espace de 40 ans. Neantmoins la Chronologie saciée ne luy en donne que 20. Mais les Rabbins, par un style qui leur est particulier, y en adjoustent autres 20. La raison qu'ils en donnent, c'est qu'encore durant 20 ans apres la mort de Samson, les Philistins n'oserent rien attenter contre Israel ; tant ils redoutoyent le nom de ce puissant homme, mesme apres son decez. Ainsi pourroit-on dire qu'Abel est representé parlant ; pource que son nom & l'exemple de

sa foy subsistent jusques à cejourdhuy. Mais ceste response ne semble nullement suffire.

C'est une memorable sentence, *Que le juste vivra de foy.* Dans le langage de Dieu, celuy est appellé vivant qui est immortel. Celuy n'est pas estimé vivre qui est sujet à perir. Dieu n'est point le Dieu des morts, mais des vivants. Or c'est la Foy qui fait vivre eternellement. Par Foy les Croyants vivent en terre, comme si desja ils estoient au ciel; & en quelque esgard, ils vivent au ciel comme s'ils estoient encore sur la terre. C'est que l'estre qu'ils ont là haut en la Gloire de Dieu, est la continuation de l'estre qu'ils avoyent ici bas en sa Grace, mais rehaussé de qualitez. Ainsi le mesme Abel, pour exprimer son immortalité bienheureuse, est représenté comme si jamais il n'estoit mort, comme s'il vivoit & parloit encore sur la terre.

Je vien maintenant au sujet qui nous a conviez à parler apres ce mort. *Act. 8.* l'Esprit du Seigneur ravit Philippe, & il disparut. L'Esprit du Seigneur nous a ravi Philippe. Celuy qui nous a mis ici a couvert; Celuy qui nous avoit logez, non seulement en ce lieu, mais en ses propres entrailles; Celuy dans l'esprit duquel nous estions si bien; Celuy qui mesme remercioit de ce que chez luy nous faisons memoire de luy en nos oraisons; Celuy qui attribuoit en partie à nos Prieres, que Dieu l'avoit delivré de deux maladies mortelles; Celuy qui nous avoit donné ses affections, & qui desiroit nous les resmoigner encore plus amples, & y apporter tout son pouvoir; Ce bienfaiteur, cest ami, ce support, nous est maintenant osté.

Act. 9. Les povres vefves monstroient en pleurant, les robbes & vestemens que Tabitha faisoit pour elles quand elle vivoit. Nous avons bien plus grand sujet d'estre dolents.

si nous nous représentons la grande & continuelle charité que ce Seigneur a desployée envers nostre public. Toute ceste Assemblée, qui est devenue comme orpheline par ceste perte, a-elle pas dequoy s'escrier avec larmes, *O mon pere, mon pere, chariot d'Israel & sa gendarmerie ?*

Ce qu'il nous a dit plusieurs fois, est advenu, Qu'il eseroit que tant qu'il vivroit, nous aurions ce lieu-ci pour y continuer nos Assemblees. Voici la septiéme année que nous en jouissons, & en ceste septiéme année, comme en une année de repos, il est allé en son repos.

Mais sa Foy & sa Pieté parlent encore, & parleront à jamais. Que nul ne m'aceuse de flatter un mort ; moy qui en la chaire de verité n'ay jamais, Dieu-merci, flatté les vivants. J'assiste ici en la presence de ce grand Dieu. Ce que nos yeux ont veu, ce que nos oreilles ont ouy, & que nos mains ont comme touché, c'est ce que je diray maintenant, & rien plus.

Avant que jamais nous eussions mis le pied en ce lieu, comme il nous eut permis de nous y assembler, estant lors attaché au lit de maladie, il nous dit de grande affection, Que le plus grand honneur qu'il eust sceu avoir, estoit, que Dieu fust servi dans sa maison. Depuis encore, combien de fois nous a-il reiteré le mesme propos ? Combien de fois nous a-il tesmoigné le plaisir qu'il prenoit que Dieu fust célébré chez luy, & que le peuple y trouvast son instruction ? Quand nous luy avons dit que jadis quelques uns avoyent receu des Anges en leurs maisons, mais qu'en la siene il avoit logé Christ ; Il nous dit, Helas ! qu'ay je qui ne soit à Christ ? qu'ay-je que je n'aye receu de luy ? Je le prie me faire la grace de le bien recognoistre.

Nous ne rapportons ici que quelques mots d'entre plusieurs propos qu'il nous a tenus à diverses fois. Car combien qu'il aimast la brieveté avec la verité, si ay-je remarqué en plu-

39
A7
sieurs occurrences, qu'il concevoit promptement tout ce que dequoy nous parlions, y respondoit punctuellement & par ordre, par un discours tres-judicieux. Nous preparions à l'avance, comme il estoit de la bienséance & du devoir, ce que nous avions à luy dire, & composions nos paroles. Mais non seulement il nous donnoit réponse sur le champ, ains aussi quelquesfois, sur des supplications que nous luy faisons, ou pour nostre public ou pour des particuliers, il nous proposoit des questions & des considerations d'importance, que nous n'avions point prevenues. Je sçay que la mesdisance s'efforce souvent de jeter son venin dans les sepulchres des plus justes & des plus sages, & tasche mesme d'empoisonner les morts. Si elle fait parler quelqu'un d'eux, elle suppose un faux Samuel en lieu du vray; un fantosme qu'elle mesme a formé, & qui ne doit point estre compté entre ceux desquels la Foy parle encore apres leur mort.

Le nom de ce mort de qui la Foy parle à nous, nous sera tousjours précieux.

En ces jours, ésquels la Religion de plusieurs consiste plus en babil qu'en realité, combien peu s'en trouveroit-il qui fussent aussi volontaires, aussi charitables envers nous, qu'à esté nostre Philippe ? Comme nous avons dit autresfois, L'Arche de Dieu ne pouvoit trouver un toit pour y estre à couvert, elle estoit mesme rebutée ; mais nostre Hobed-Edom la receut promptement & alaigrement en sa maison. Ce précieux oignement dont il a oinct les pieds de Jesus Christ, remplira tousjours de son odeur non seulement ceste maison, mais aussi son sepulchre mesme, non-obstant le murmure de plusieurs.

Entre les dernieres paroles que nous avons eues de son affection, trois semaines avant son decez, il nous prononça celles-ci, par lesquelles il sembloit predire sa mort prochaine ; *Si Dieu me retire de ce*

moide, j'ay un fils, auquel je donneray charge, autant qu'un pere peut commander à ses enfans, que vous ne manquiez point de lieu pour vous Assembler. Nous relevons aujourd'huy ces paroles comme la manteline d'Elie, laquelle il nous a laissée lors qu'il montoit au ciel. Puis que Jacob est mort, nous irons vers Joseph, & luy dirons, Ton pere a dit avant sa mort, Je te prie, que ces gens-ci trouvent faveur en tes yeux. Ce corps despouillé de vie, parle encore pour nous.

Mais il est encore vivant, voire en la personne mesme de son fils. Nous avons encore le mesme Philippe, en qui vivent les mesmes affections que le pere avoit pour nous. Qu'à jamais puisse-il vivre ! Que la memoire de nostre Bienfaiteur soit tousjours odorante comme l'encens de Saba. Que la posterité soit florissante. Que ses enfans soyent comme le germe du Liban és jours d'esté. Que leurs jours soyent comme les jours du Soleil. Et

(19)

que tousjours la lampe de Dieu demeure allumée en leur tabernacle.

Et quant à nous, puissions-nous tellement vivre, que nostre Foy parle encore apres nostre mort ! Toutes choses sont à nous. Soit Philippe, soit la vie, soit la mort, toutes choses sont à nous, & nous à Christ, &

Christ à Dieu. Et à ce
grand Dieu immor-
tel soit loüange
eternelle-
ment.

FIN.



39

A7



REPRODUCED FROM THE COPY IN THE
HENRY E. HUNTINGTON LIBRARY

FOR REFERENCE ONLY. NOT FOR REPRODUCTION